



Općina Novi Grad Sarajevo u saradnji sa humanitarnom organizacijom Muslim Aid realizirala je projekat “Pokreni vlastiti biznis u poljoprivredi” koji je implementiran kroz pokretanje plasteničke proizvodnje, odnosno formiranje novih radnih mjesta u poljoprivrednoj proizvodnji.

Projektom je obuhvaćeno pet korisnika kojima su dodijeljeni plastenici od 300 metara kvadratnih plasteničkog prostora sa sistemom za navodnjavanje, sjemenskim sadnim materijalom i pratećom opremom.

Ovim projektom Općina Novi Grad nastavlja realizaciju jedne od mjera poticaja privredi i zapošljavanju, koja je dio programa “Pokrenimo Novi Grad zajedno”.

Na taj način ova lokalna zajednica radi na tome da se na njenom području omogući otvaranje novih radnih mjesta, a cilj ovog projekta je omogućiti ljudima da sami sebi obezbijede radno mjesto.

U sklopu ovog programa Općina i Muslim Aid obezbjedili su 90 posto sredstava potrebnih za jedan ozbiljan pristup plasteničkoj i poljoprivrednoj proizvodnji, dok deset posto sredstava obezbjeđuju sami korisnici. Ukupna vrijednost projekta je 36.900 KM .

Općina Novi Grad Sarajevo je na osnovu donesenog Pravilnika o utvrđivanju uslova, kriterija i postupaka za ostvarivanje prava na dodjelu plastenika objavila dva javna poziva (august i novembar 2015. godine) za predaju zahtjeva za sufinansiranje dodjele plastenika. Pravo na dodjelu plastenika imala su nezaposlena fizička lica koja imaju prebivalište na području općine Novi Grad Sarajevo u kontinuitetu od najmanje godinu i prijavljeni su na evidenciji JU Služba za zapošljavanje Kantona Sarajevo - Biro Općine Novi Grad, posjeduju poljoprivredno zemljište pogodno za zasnivanje plasteničke proizvodnje na području općine, odnosno Kantona Sarajevo.

Dobitnicima plastenika omogućena je i edukacija iz oblasti plasteničke proizvodnje, koja je

Općina Novi Grad Sarajevo kroz poljoprivredni projekt dodjelila plastenike

Autor Agro Servis

Utorak, 12 Januar 2016 12:34

održana u prostorijama Centra za razvoj biznisa Općine Novi Grad Sarajevo. Praktični dio edukacije održan je na imanju firme "Bios" gdje su imali priliku vidjeti i sam proces proizvodnje u plasteniku.

U narednom periodu, potpisnici ugovora imaju obavezu pohađati jednodnevni edukativni seminar iz ekonomije poslovanja koji će organizirati Općina Novi Grad Sarajevo u sklopu redovne aktivnosti provođenja edukacija iz raznih oblasti poljoprivredne proizvodnje.

Također, korisnicima ovog programa bit će pružena mogućnost da svoje proizvode plasiraju putem Bosanske tržnice na Dobrinji, kao i ostali podsticaji na koje imaju pravo.

Izvor: Akta.ba